

De Palm Tours a presenta oficialmente e Parke di Awa nobo na prensa local

ORANJESTAD – Ayera mainta prensa local a topa na e Isla Priva di De Palm pa asina conoce mas di serca e proyecto mas nobo di De Palm Tours, esta un Parke di Awa gigantesco cu ta situa riba e isla mes y a rekeri un inversion multi-miyonario. Presente pa introduci e Blue Parrot Water Park tabata Harold Malmberg, kende ta encabesa e hunta di directiva di De Palm Tours, Ricardo Malmberg, miembro di e hunta di directiva, Angelica Vleeming, Marketing Manager di De Palm y Ilaina Franco, Marketing Coordinator. Ademá di e construccion di e parke di awa grandi y bunita, e isla a pasa den un periodo di remodelacion y expansion y awor e isla su playanan

di santo blanco ta yen di camanan y stoelnan pa lounge y cabananan, tambe un area pa hunga beach volleyball, cla pa relaha y entretene bo.

Pa bishita de Palm Island bo ta paga un prijs inclusivo, cual ta inclui tur bo bebida y cuminda, uso di e facilidadnan manera e showers, lockers y camber pa cambia paña, ekipo di snorkeling y les di snorkeling, uso di e parke di awa cu ta contene 6 slip di awa y mas cu 70 wega di awa pa henter famia, y hopi mas.

E apertura di e parke di awa ta coincidi perfectamente cu e cuminsamento di e vacacion escolar, y famianan sigur lo pasa un dia dibirtido disfrutando di tur loke e isla tin pa ofrese.

